

Aallakaatitsisinnanermut akuersissutinut maleruagassat pillugit Namminersornerullutik Oqartussat nalunaarutaannut

Radiukkut tv-kkullu aallakaatitsisarneq pillugu Inatsisartut peqqussutaanni nr. 6, 14. november 2004-meersumi § 9, imm. 3, § 12, imm. 4, aamma § 59, imm. 2 aamma 3 naapertorlugit aalajangersarneqarput:

Aallakaatitsisinnanermut akuersissutit

§ 1. Ingerlatseqatigiiffiit, peqatigiiffiit assigisaasaluunniit qinnuteqarnerisigut Naalakkersuisut nuna tamakkerlugu aallakaatitsisinnanermut akuersissuteqarsinnaapput (nuna tamakkerlugu aallakaatitsisinnanermut akuersissut), tak. radiukkut tv-kkullu aallakaatitsisarneq pillugu Inatsisartut peqqussutaanni § 9, imm. 1.

Imm. 2. Ingerlatseqatigiiffiit, peqatigiiffiit assigisaasalu kiisalu kommunit qinnuteqarnerisigut Radio- tv-lu pillugit aalajangiisartut nunaqarfigisami aallakaatitsisinnanermut akuersissuteqarsinnaapput (nunaqarfigisami aallakaatitsisinnanermut akuersissut), tak. radiukkut tv-kkullu aallakaatitsisarneq pillugu Inatsisartut peqqussutaanni § 10, imm. 1.

Nuna tamakkerlugu aallakaatitsisinnanermut akuersissutit

§ 2. Nuna tamakkerlugu aallakaatitsisinnanermut akuersissummik qinnuteqaat kultureqarnermut pisorta qarfiimmut, qinnuteqaatip paasisutissanik radiukkut tv-kkullu aallakaatitsisarneq pillugu Inatsisartut peqqussutaanni § 12, imm. 1-imi taaneqartunik imaqarneranik naliliisussamut nassiuuneqassaaq. Qinnuteqaat aammattaaq aallakaatitassiornermut akisussaasumit atsiorneqarsimassaaq.

§ 3. Kultureqarnermut pisorta qarfiup nuna tamakkerlugu radiukkut tv-kkullu aallakaatitsisinnanermut akuersissummik qinnuteqaatinik suliaqarnermini misissortassavaa, nuna tamakkerlugu aallakaatitsisinnanermut akuersissummik tunniussinissamut piumasaqaatit radiukkut tv-kkullu aallakaatitsisarneq pillugu Inatsisartut peqqussutaanni § 14, imm. 1-imi aalajangersarneqarsimasut naammassinneqarsimanersut.

§ 4. Nuna tamakkerlugu aallakaatitsisinnanermut akuersissut tunniunneqartinnagu kultureqarnermut pisorta qarfiup qinnuteqaat tusarniarneqartartussanut tusarniaassutigalugu nassiuutissavaa.

Imm. 2. Kultureqarnermut pisorta qarfik tusarniaanermut imm. 1-imi taaneqartumut ilutigitillugu, radiofrekvensit pillugit inatsisip Kalaallit Nunaanni atuutilersinneqarnera pillugu peqqussut naapertorlugu frekvensimik atuinnissamut akuersissummik, qinnuteqartoq sinnerlugu Namminersornerullutik Oqartussat Radioforvaltningianut qinnuteqassaaq.

§ 5. Kultureqarnermut pisorta qarfiup akuersissuteqarnissamini piumasarisinnaavai naatsorsuutit, sanaartornermut ingerlatsinermullu missingersuutit, matumani aamma ingerlatsinerup qanoq aningaasalersorneqarnissaanik, soorlu pilerisaarutigut, aallakaatitanik aningaasalersuisoqarneratigut, piffissamik aallakaatitsivissamik tunisaqarnikkut atuisulluunniit akiliuteqartarnerisigut, pinnguaatit unammisitsinerillu aningaasarsiorfusinnaasut pillugit paasissutissat nassiunneqarnissaat, ileqqoreqqusanik, ileqqoreqqusat allannguutaannik, aallakaatitsissutit aallakaatitassiornermilu atortut suunerisa allaaserineqarnerannik, aallakaatitsisarnermut uppersarsaatinik, ullormik aallartiffissamik, sapaatip akunneranut nal.ak. aallakaatitsiffissanik, taakkulu ullunut piffissanullu agguataarneqarnissaannik kissaatigisanik nassiussisoqarnissaa.

Imm. 2. Paasissutissanik imm. 1-imi taaneqartunik nassiussinissamut piffissaliussat kultureqarnermut pisorta qarfiup aalajangersarsinnaavai.

Imm. 3. Pissutsit qinnuteqaammik taaneqarsimasut piffissami akuersissuteqarfiusumi allannguuteqassagualarpata taakku kultureqarnermut pisorta qarfiup naluunneqartutit erseqqinnerusut aalajangersarsinnaavai. Piumasaqaatit aallakaatitsisarnaanermut akuersissummi allassimassapput.

§ 6. Kultureqarnermut pisorta qarfiup nuna tamakkerlugu aallakaatitsisarnaanermut akuersissummi tunniussisoqarnissaanut atatillugu aallakaatitsisarnermut il.il. piumasaqaatit erseqqinnerusut aalajangersarsinnaavai. Piumasaqaatit aallakaatitsisarnaanermut akuersissummi allassimassapput.

Imm. 2. Kultureqarnermut pisorta qarfiup ingerlatseqatigiiffiit, peqatigiiffiit assigisaasalu nuna tamakkerlugu aallakaatitsisarnissaannut akuersissummi tunniussinermut atatillugu aallakaatitsisarnissap qinnuteqaammut naapertuuttumik ingerlanneqartarnissaa piumasarisinnaavaa.

§ 7. Pilerisaarutit aallakaatitanullu aningaasalersuisoqartarnera, peqqussummi kapitali 7-imi maleruagassat aammalu aalajangersakkat peqqussummi §§-it 53 aamma 55 naapertorlugit aalajangersarneqartut malillugit aallakaatitsisarnermi ilaasinnaapput.

Imm. 2. Pilerisaarutit aallakaatitanullu aningaasalersuisoqartarnera pillugit maleruagassat malinneqarnerat akuersissutit piginnittuata nakkutigissavaa.

§ 8. Pinnguaatit unammisitsinerillu aningaasarsiorfusinnaasut aallakaatitsisarnermi ilaasinnaapput.

§ 9. Nuna tamakkerlugu aallakaatitsisarnaanermut akuersissummi piginnittup radiukkut tv-kkullu aallakaatitsisarneq pillugu maleruagassanik malinninnera kiisalu aallakaatitsisarnermut piumasaqaatinik malinninnera Radio- tv-lu pillugit aalajangiisartut nakkutigissavaat.

§ 10. Akuersissummi piginnittup maleruagassat radiukkut tv-kkullu aallakaatitsisarneq pillugu peqqussummi aalajangersarneqartut aalajangersakkalluunniit peqqusut naapertorlugit aalajangersarneqartut, matumani aamma nalunaarummi uani maleruagassat unioqqutippagit, unioqqutitsinerlu annertuppat arlaleriarluniluunniit unioqqutitsineruppat nuna tamakkerlugu aallakaatitsisarnaanermut akuersissut kultureqarnermut pisorta qarfiup Radio- tv-lu pillugit aalajangiisartut inassuteqarnerisigut atorunnaarsikkallarsinnaavaa atorunnaarsivissinnaalluguluunniit.

Imm. 2. Atorunnaarsitsineq aammattaaq pisinnaavoq akuersissummi piginnittup piumasaqaatit akuersissuteqarnermi nalunaarutigineqarsimasut sumiginnarpagit.

§ 11. Kultureqarnermut pisorta qarfiup aallakaatitsisarnaanermut akuersissutit piffissami aalajangersimasumi, annerpaamik ukiunik 10-nik sivilissuseqartumi atuussinnaasut tunniuttassavai. Aallakaatitsisarnaanermut akuersissut piffissap qaangiutillernerani qinnuteqartoqarneratigut nutarterneqarsinnaavoq, tak. § 1, imm. 1.

§ 12. Nunaqarfigisami aallakaatitsisinnaanermut akuersissummik qinnuteqaat Radio- tv-lu pillugit aalajangiisartunut, nunaqarfigisami aallakaatitsisinnaanermut akuersissutininik tunniussinissamut piumasaqaatit radiukkut tv-kkullu aallakaatitsisarneq pillugu Inatsisartut peqqussutaanni § 13, imm. 1-imi aalajangersarneqartut naammassineqarsimanerannik naliiisussanut nassiunneqassaaq.

Imm. 2. Nunaqarfigisami aallakaatitsisinnaanermut akuersissummik qinnuteqaatip immersugassaq Radio- tv-lu pillugit aalajangiisartunit tunniunneqartoq atorlugu pinissaa Radio- tv-lu pillugit aalajangiisartut aalajangersinnaavaat. Immersugassaq Radio- tv-lu pillugit aalajangiisartunit suliarineqassaaq.

Imm. 3. Radio- tv-lu pillugit aalajangiisartut nunaqarfigisami aallakaatitsisinnaanermut akuersissummik qinnuteqaatip imm. 1-imi taaneqartup suliarineqarneranut ilutigitillugu, radiofrekvensit pillugit inatsisip Kalaallit Nunaanni atuutilersinneqarnera pillugu peqqussut naapertorlugu frekvensimik atuinissamut akuersissummik, qinnuteqartoq sinnerlugu Namminersornerullutik Oqartussat Radioforvaltningianut qinnuteqassapput.

§ 13. Radio- tv-lu pillugit aalajangiisartut piumasaqaatit radiukkut tv-kkullu aallakaatitsisarneq pillugu Inatsisartut peqqussutaanni aalajangersarneqarsimasut saniatigut piumasarisinnaavaat qinnuteqarnermut atatillugu naatsorsutininik, sanaartornermut ingerlatsinermullu missingersuutininik, matumani aamma ingerlatsinerup qanoq aningaasalersorneqarnissaanik paasissutissanik nassiussisoqarnissaa, soorlu makkunuunatigut:

- 1) Pilerisaarutit.
- 2) Aallakaatitanut aningaasalersuinerit.
- 3) Piffissamik aallakaatitsivissamik tunisineq.
- 4) Atuisut akiliuteqartarnerat.
- 5) Pinnguaatit aningaasarsiorfusinnaasut.
- 6) Unammisitsinerit.

Imm. 2. Aammattaaq Radio- tv-lu pillugit aalajangiisartut qinnuteqaatip nassiunneqarneranut atatillugu makkuninnga nassitsisoqarnissaa piumasarisinnaavaat:

- 1) Ileqqoreqqusat, matumani aamma ileqqoreqqusat allannguutaat.
- 2) Aallakaatitsisarneq pillugu uppersaasat.
- 3) Aallakaatitsinerup allaaserineqarnera, matumani aamma sapaatip akunneranut nal.ak. aallakaatitsiviusut amerlassusii, taakkulu ullunut piffissanullu agguataarneqarneri.
- 4) Ulloq aallartiffissaq pillugu kissaatigisat.

Imm. 3. Paasissutissanik imm. 1-imi 2-milu taaneqartunik nassiussinissamut piffissaliussat Radio- tv-lu pillugit aalajangiisartut aalajangersarsinnaavaat.

§ 14. Nunaqarfigisami aallakaatitsisinnaanermut akuersissummik § 17, imm. 1 aamma § 18 naapertorlugit qinnuteqaammut tunngatillugu Radio-tv-lu pillugit aalajangiisartut aalajangigaat allaffeqarfikkooortumik oqartussaasunut allanut naammagittaalliutigineqarsinnaanngillat.

Pineqaatissiisarnerit il.il.

§ 15. Kinaluunniit § 1, § 5, imm. 1, §§-it 6-imiit 10-mut, §§-it 13-imiit 14-imut aamma § 18, imm. 1 aamma 2 unioqqutillugit aallakaatitsisoq pillaammik akiliisinneqarsinnaavoq, tak. peqqussummi § 59.

Imm. 2. Aktieselskabit, anpartsselskabit, andelsselskabit, peqatigiiffiit assigisaalluunniit unioqqutitsippata, tak. imm. 1, ingerlatseqatigiiffik il.il. peqqussummi § 59, imm. 3 naapertorlugu akiliisitsissummik taamaattumik akiliisussanngortinneqarsinnaavoq. Kommuni kommunilluunniit suleqatigiiffiat il.il.

unioqqutitsippat kommuni kommunilluunniit suleqatigiiffiat il.il. aalajangersagaq aamma taanna naapertorlugu akiliisitsisummik taamaattumik akiliisussanngortinneqarsinnaavoq.

§ 16. § 1 naapertorlugu aallakaatitsisinaanermut akuersissutit Tusagassiuuteqarnermi akisussaaneq pillugu inatsisip Kalaallit Nunaanni atuutilersinneqarnera pillugu peqqussummi nr. 39, 20. januar 1997-imeersumi maleruagassanut naapertuuttumik atorineqassapput.

Imm. 2. Maleruagassanik imm. 1-imi taaneqartunik unioqqutitsineq Kalaallit Nunaanni Tusagassiuutit pillugit aalajangiisartut, pitsaasumik tusagassiornissaq akissuteqartarnerlu pillugit suliaassani naammagittaalliortarfiusup oqartussaaffiut ilaavoq.

Aalajangersakkat atortuulersitsisuusut, ikaarsaarutaasut atorunnaarsitsisuusullu

§ 17. Nalunaarut una ulloq 1. januar 2005-imi atortuulerpoq. Tassunga ilutigitillugu atorunnaarsinneqarpoq Radiukkut fjernsynikkullu aallakaatitsisarneq pillugu Namminersornerullutik Oqartussat nalunaarutaat nr. 34, 26. november 1991-imeersoq, taamaattoqli tak. imm. 2.

Imm. 2. Akuersissutit Radiukkut fjernsynikkullu aallakaatitsisarneq pillugu Namminersornerullutik Oqartussat nalunaarutaat nr. 34, 26. november 1991-imeersoq naapertorlugu nunaqarfigisami radioqarfinnut tv-qarfinnullu tunniunneqarsimasut atuutiinnassapput ullup akuersissutip atorunnaarfissaatut aalajangersarneqarsimasup tungaanut, imaluunniit Radiukkut tv-kkullu aallakaatitsisarneq pillugu Inatsisartut peqqussutaat naapertorlugu akuersisummik tunineqarnissap tungaanut, tak. Radiukkut tv-kkullu aallakaatitsisarneq pillugu Inatsisartut peqqussutaanni § 63, imm. 1 aamma § 60, imm. 3.

Namminersornerullutik Oqartussat, ulloq 23. december 2004

Henriette Rasmussen

/

Lise Lennert Olsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut